

金華宗旨後跋

憶昔余小子元奉教於易菴先生之門先生授以淨明忠孝錄一册曰此旌陽真君四字天經真君從諶母受斗中孝悌王之傳以儒證道以道振儒化度弟子多儒流惇敘人倫服勤官政志節卓然間出而斬除妖魅拯救生靈無非本性地之光明爲濟世之勳業卽錄中所謂淨明道法忠孝雷霆者也小子敬奉而讀之他日呂祖命易菴先生以下七人傳示宗旨其鑒證者王天君也是日萬靈萃止八景浮空七人拜而授教直接斗中孝悌王之真傳卽太乙金華宗旨也其初授也不落言詮絕無文字直指羲皇書前之易根於無妙於有自一本而萬殊由萬

道藏輯要

金華宗旨
後跋

二

室集二
ノノノ

殊而一本亘古亘今貞恆不變其金華之謂乎嗣後發揮宗旨動靜無端陰陽無始其流行於日用則六位時成卽今日影輝窗拈毫呵凍凝神定慮敬述緣起無非由朝乾夕惕之本懷爲或潛或見之面目盛德大業不離現前卽現前爲本體卽本體是工夫神矣哉真金華遞傳之嫡血也迄今歷二十餘年孝悌王又重提舊時宗旨元卽授同學張子爽菴訂輯書成復蒙列祖各序簡端命元述緣起一大事因緣時節豈偶然哉元等昔以七人受教於祖今派下諸同學又適符七人之數益信道緣之不可思議也自今以往傳示無窮化度無量卽邵子所謂我不得而知之聖人亦不得而知之者耶金華嗣派弟子宇菴屠

乾元敬題

按此經於康熙戊申蒙


孚佑上帝垂示人間其時受法弟子爲潘易菴屠宇菴莊惺菴
莊誠菴周楚鶴劉度菴許深菴七人至壬申歲復提唱宗旨
時又有張爽菴李時菴馮返菴馮近菴許凝菴潘真菴潘卓
菴亦適符七人之數乾隆乙未錢塘邵志琳得蘇門吳氏抄
本自加訂定刊入全書宗正今屆重訂之期廣化子復釐定
之歸入集中而囑予詳誌前此諸人姓氏爰臚列之俾不致
湮沒云爾正化子法嗣恩洪謹識

道藏輯要

金華宗旨
後跋

三

室集二
上三



道教學術資源